

左恪靖侯奏稿續編

恪靖奏稿續編卷四十六目錄

進攻西寧回匪迭勝摺

西寧官軍大勝大概情形片

圍剿肅州疊獲勝仗摺

請調殺軍赴甘摺

請飭張曜分營駐靈州花馬池片

密陳西寧情形片

奇營勇潰自請議處片

徐占彪丁憂仍請留管片

進攻西寧回匪迭勝摺

奏爲官軍進攻西寧剿辦土客名回疊獲全勝恭摺馳
陽仰祈

聖鑒事竊照西寧土客名回疊次求撫各繳馬械臣均
飭道員馮邦棟隨時驗收惟察所繳馬械多不適用馮
邦棟催令悉數呈繳客回藉故遲延土回則以客回擾
害不能不稍留馬械準備抵禦爲詞臣飭暫緩呈繳先
將存留馬械造冊申賚俟客回事定再繳一面飭三品
卿銜道員劉錦棠提督何作霖等率馬步各營分起前

進比劉錦棠等於七月二十及八月初一日等先後行
次礮伯初七日各土回目續繳馬械到營馬疲械鈍與
前無異仍自結稱限半月內全繳並允辦軍糧惟求官
軍緩進蓋以西甯收穫之期約在九月初旬也劉錦棠
以同情多詐收穫後恐彼飽我飢辦理費手又慮地氣
早寒一經凝凍則營壘均難修築遂出示曉諭土回安
堵無恐以便直搗陝回巢穴留直隸州知州龍錫慶所
部綏定營紫七里鋪親率馬步進紮平戎驛該處地勢
平闊逼近陝回所踞之大小南川並分兵聯紮馬營灣

及三十里舖距西寧府城三十里與小峽口毘連察看沿途土回堡寨僅留壯丁待收獲餘均潛逃劉錦棠詞其有異飭所部勿犯秋毫致有藉口初十日提督余虎恩率隊入觀音堂溝放水土回開鎗抗拒傷勇丁二名十一日劉錦棠率馬隊至峽口周覽地勢突見堡中出馬步百餘施放鎗礮弁勇受傷者三名官軍舉鎗還擊斃賊數名賊遁十二日馬營灣各營瞥見馬步賊千餘由山頂繞至榆柴溝劉錦棠當飭提督譚上連遊擊董福祥都司張俊李雙良等由左路登山邀擊提督陶生

林遊擊熊隆名率馬隊沿溝列陣山險路窄該逆排列
峯顛恃險穩拒劉錦棠揮軍分隊上山立斃悍賊數名
該逆滾溝而遁掩殺三四十名生擒一名追及紅水溝
百返是日另有馬步悍賊二千餘由府城而來竟奔峽
口撲近三十里鋪營盤湟河北岸亦有賊數百隔河吶
喊助勢何作霖因修壘未成僅調洋礮隊出伏破屋及
山溝內向賊轟擊該逆見大隊未出又恃紅水溝之賊
已繞及後路遂愈撲愈近何作霖俟其攻撲逾時氣已
衰竭整隊猛出擊之該逆驚潰追斬數十名擒四名奪

獲又子鎗十餘桿追逾山原數重始行收隊訖據擒賊
供稱紅水溝之賊係白彥虎馬鎮國畢大才等逆峽口
一帶之賊係禹得彥崔三等逆內均雜有西寧土回劉
錦棠計該逆既糾股出敵決不還回老巢預飭余恩虎
等分伏馬營灣各山岔復飭提督譚和義蘇大勝及熊
隆名等由馬營灣渡河擊峽口北山之賊又調陶生林
李雙良張俊等赴三十里鋪助剿十三日該逆果率大
股三四千分布峽口南北兩山馬賊繞至峽東各營仍
照常築壘陶生林等先後齊集遂飭何作霖等衝撲峽

口張俊李雙良等分起仰攻南山陶生林由山溝抄賊後該逆已先於夜間在峽中砌石卡二座憑卡放鎗南山之賊亦憑險死拒鎗礮如雨血戰逾兩時譚和義等已渡湟馳上北山立將山頂踞逆擊散斬馘二十餘名徑趨峽口以西陶生林亦從溝內抄出南山之南賊乃大潰何作霖乘勝衝入峽口攻破石卡卡賊數百殲斬及自盡無一脫者生擒禹逆所部頭目李金良奪戰馬十餘匹叉子鎗四十餘支刀矛無算是日有馬步賊數百由紅水溝迤邐而出遇伏驚竄余恩虎等分路追斬

亦多十四日馬賊百餘遁馬營灣山溝出竄提督譚慎
典追斬數名十五日有馬步賊在小峽口山頭吶喊何
作霖等調洋礮隊仰轟之賊遁十六日零賊數百由巴
藏溝出提督羅照陞擊走之十七日諜稱平戎西高驢
溝口卓子山有賊乘夜脩壘并有大股賊在溝屯聚當
率馬步馳抵高驢遙見山巔堅壘已成溝內有土回空
堡五座仍爲賊踞各山頭賊旂林立眾約五六千當飭
陶生林余虎恩等由左路入溝擊踞堡之賊飭譚和義
等由中路登山攻賊壘熊隆名李雙良由右路擊各山

援賊弁勇奮躍直前賊憑堡穩抗山上之賊復併力下
援陶生林熊隆名等揮軍合擊鏖戰逾時斃悍賊無數
山上賊先潰堡中各賊亦奔門逃竄踞壘之賊遂齊隊
衝出譚和義等截之復縮退入壘各路敗賊又麀聚回
援陶生林譚上連等分路堵擊自辰至酉賊始敗奔各
營會攻山壘壘賊鎗石併發急攻不下時已昏暮劉錦
棠督軍露宿環攻五鼓時霜風凜冽該逆趁月光陰弱
時由壘西峻壁滾身潛遁追斬數十名其墮折手足及
自盡與受傷者甚眾獲馬數十匹鎗矛數百件是日另

股賊約數千出峽口攻何作霖營盤何作霖及提督尹興茂席大成等力戰卻之十八日騎賊二三百渡湟援馬營一帶經何作霖擊退十九日飭李雙良分哨紫平戎以西大股賊仍由高壩溝口而出劉錦棠揮軍分三路進擊賊知不敵仍退縮入溝追斬數名賊且戰且退官軍結方陣追之直搗高家堡高家堡卽逆首白彥虎行巢也白逆噉眾返關官軍如墻而進刀斫矛刺殲悍賊五百餘棄巢狂奔官軍焚其巢而返是日有步賊二千餘出峽口撲攻何作霖營壘復有騎賊由北岸渡湟

抄出壘後勢甚兇悍何作霖堅守不出及午賊氣已衰
官軍開壁齊出尹興茂扼其前何作霖及席大成繞壘
後包抄又分哨先堵渡口馬賊倉猝搶渡中流沈溺數
十名渡河不及者悉被截殺而奪其馬壘前之賊亦負
創而遁二十一日劉錦棠督軍在馬營修壘聞峽口礮
聲又見馬賊數百已由何作霖壘徑繞至上紅莊一帶
密飭陶生林等率馬隊分伏廢堡步隊修築如常馬賊
漸逼新營見僅只步隊修築營盤遂放膽進撲忽陶生
林等馬隊由廢堡躍出步隊合力夾攻該逆奔逃不及

立斬多名其鬼水淹沒者不計其數落後者悉數擒獲
劉錦棠分兵扼河親率熊隆名董福祥等馳赴峽口何
作霖等麤戰已久見援兵大至奮威猛撲各營繼之賊
乃大敗山頂尙有賊數百放鎗抗拒熊隆名等下馬步
戰斬馘遂多餘逆滾溝而遁是日白彥虎率騎賊出高
驢溝撲分哨之壘李雙良憑牆力禦鎗斃悍逆多名余
虎恩聞警赴援賊敗退計自進紮以來無日不戰其中
苦戰如十七十九二十一二二十三等日光於至險之中
克獲奇捷計先後斬馘生擒實千數百名溺斃受傷者

不知其數十九高強溝之戰砲斃紅衣賊目據擒賊供
卽首逆白彥虎夥內總目馬大賊中所推六元帥克憚
最著者也此外陣斃紅衣悍目尙多其名姓不可得詳
二十三日之戰首逆禹得彥聞亦帶傷自此兇敵亦當
稍減惟劉錦棠所部除留駐靈州金積堡一帶僅馬步
十四營臣分隸以龍錫慶步隊兩營熊隆名陶生林馬
隊兩營尙止馬步十八營而自礮伯紫至小峽口計程
八十餘里山路峻雜現在土回與客回聯成一片每戰
賜彌山寨谷四出撓我殊有應接不暇之勢又所需軍

糧子藥運至前敵各營均須派隊往來護送時有戰事
兵力屢分而見單幸官軍皆百戰之餘劉錦棠又敏銳
善戰故能履險如夷臣現擬調提督劉明燈率馬步六
營駐碾伯之西南專司護運俾得壹意進取毋憂後顧
如兵力足敷則繞由威遠鎮出奇兵卽轉其糧以餉軍
尤爲全算臣自當慎以圖之各戰傷亡員弁勇丁俟查
明彙請

優卹謹會同西甯辦事大臣孫師合詞陳
奏伏乞

皇太后

皇上聖鑒訓示謹

奏

同治十一年九月十九日

西甯官軍大勝大概情形片

再正拜招開適接劉錦棠稟報八月二十四至九月初四日勦賊連獲大勝先後斃賊共二千餘名二十七日礮子洞穿首逆白彥虎左乳當經逆眾搶回南川賊巢二十九日首逆馬桂源之弟馬真源在小峽力抗官軍亦被礮子洞中右肋其撒拉五工助逆回目多拜已經

官軍陣斬撒拉逆回亦遁回五工據生擒西甯逆目馬
仲供如此並探得九月初六日劉錦棠已踏破觀音堂
一帶賊壘機勢甚利所有詳細情形容俟查明續報謹
附片陳明以慰

聖懷謹

奏

同治十一年九月十九日

圍剿肅州迭獲勝仗摺

奏爲官軍圍剿肅逆叠獲勝仗恭馳陳仰祈

聖鑒事竊提督徐占彪逼攻肅州七月初二日以前戰

事已經馳陳在案肅城外土地沃衍又值雨澤優霑禾稼豐茂徐占彪調團民收拔以官兵護之計旬日間得糧數千石初十日城逆馬七馬得鎮等款營乞撫徐与彪知其爲緩攻計也姑漫應之密覘該逆數百成羣日夜收糧割草往來不息十九日率馬步繞城巡視瞥見南城外劉家空堡二座又有賊據約千餘又朱家堡北舊墩二座亦各踞賊百餘見官軍至卽施放鎗礮官軍掩殺堡外零賊十餘名餘仍縮退二十日率各營分攻三墩城逆以二千餘援前墩提督陳春萬擊卻之回軍

圍攻賊已棄墩而逸有另股援中後二墩總兵黃祖福等禦之徐古彪揮親兵攻中墩破之守備孫三級躍上牆垣手刃千長楊逆及悍黨十餘名身受七傷力竭而殞是夜千總藍明泰襲破後墩守賊鮮有脫者二十一日遊擊徐春先等夜攻劉家堡出賊不意以火器拋入賊奪門而走官軍伏暗中擊以鎗礮轟斃甚多二堡旣克官軍卽填紮之二十二日陝回王萬有等以城逆發糧日減且與歸化營回勇半屬親故遂以二百餘騎至歸化營請降願勦賊自贖徐古彪允之委歸化營營官

千總藍明泰管帶合紮二十四日城逆數百自北門出
飭各馬隊追擊之斬賊多名擒八名新收回勇接戰尤
力傷亡亦數名月杪秋糧繼熟賊每乘夜潛出收穫遂
派正新後兩路分哨紮城西大路三十日徐古彪率隊
赴塔兒灣一帶搜剿行次黃草壩見賊約四五百正在
搶獲揮軍擊之斃賊數十名擒八名盡奪其牲畜糧束
餘逆狂竄回城再抵塔兒灣又遇收糧賊三百餘載糧
回城見兵而潰擊殺數十名擒二名餘逆亦盡棄牲畜
逃匿空堡八月初一日分所部馬步一營爲兩營環城

聯紮距城僅一里半里不等各相間里許自城西迤邐而南又繞城東迤北城角僅餘北門一面未克合圍正修壘間城逆由南門出賊千餘西衝新左新中等營東門亦出賊千餘撲歸化等營當飛飭附營馬步左右抄之兩路之賊均敗伏濠沿以蔽鎗礮城上開鎗礮助拒徐古彪調副將蕭蘭玉赴正營仔備李道修赴左營以開花礮對城轟擊子落城內極多人聲鼎沸又密調劈山礮隊排指東南兩門一面傳令名營收隊伏壕之賊見官軍收隊急趨入城官軍劈山礮隊一齊轟發賊應

聲倒競奪門入自相蹂踐屍骸枕藉初二日辰刻悍賊
三四千出北門圍攻歸化兩營甚急徐古彪飭馬隊繞
後擊之抽正副新後各營截其歸路餘營排列東南城
下賊正與歸化兩營相持馬隊馳至兩面夾擊遂敗退
城下而歸路又爲官軍抄截不能收避壕中遂折向東
路鼠竄而遁各營排礮轟擊鎗子雨注斃賊約數百名
其分匿東南壕沿者開鎗外拒城上亦開礮助之對轟
竟日始收隊初三日馬賊二名遞呈乞撫北門旋出賊
六七百遁城東下希圖收屍當派總兵齊懷松等截其

後賊抵死鏖戰馬隊亦從旁抄至殲賊甚多餘賊伏匿
壕中官軍撤隊始遁竄回城初四日大股賊出北門分
爲四股每股約千餘人一循壕而東至副營前排逼壕
沿一圍攻歸化右營一由四霸北面繞出歸化營後一
列隊城東化徐占彪當飭徐春先禦副營前之賊飭陳
春萬黃祖福由四霸攻賊後飭總兵陳登雲出四壩以
東抄之馬隊往來爲援副營前之賊拚死猛撲不少卻
徐占彪親率馬隊由左路橫衝賊隊徐春先亦由右路
截之斃悍逆數十名賊始退紮北城角與列隊城下之

賊合爲一起李道修以開花礮向賊擊之垛口應聲崩裂礮石飛擲城干賊受傷甚多悉奔匿城濠徐占彪折馳四壩陳春萬正與賊戰賊伏溝坎鎗礮不能及城上護以鎗礮勢難逼攻飭蕭蘭玉以開花礮轟其城樓擊塌樓檐一角傷賊多名伏溝之賊亦驚起向四壩奔逸其圍攻歸化營之賊填壕築堞逼攻甚猛徐春先等援之賊分隊抵禦千總郭三起怒馬斫陣直搗中堅馬隊相繼衝入藍明泰亦開壁夾攻斃賊百餘名奪鎗械鈹鋤百餘件餘賊敗奔北門惟四壩潰賊未及入城城中

馬賊立六百由北屈頭迎護陳春萬黃祖福率師邀擊
殲賊百餘獲旂械多件初五日飭副將桂錫楨移紮北
崖頭斷其出路收糧之賊千餘未能入城者均西竄出
關又據逃出難民供稱連日之戰賊中傷亡千萬長十
五名阿渾三名此七月十九至八月初五日圍剿肅逆
疊獲勝仗之實在情形也臣維肅州回逆恃其壕深城
堅鎗礮層疊爲負岨久抗之計現將城外新麥刈穫過
半賊中糧食無多援賊無集糧趨赴之理是不擊援賊
而援自絕也如此時有勁旅十數營布紮北門一面多

昇攻貝畫夜轟之堅城計可速拔惟兵力未能遠合長
圍慮賊從走出關又成不了之局現在秋令已深計逾
九月則冰雪凝沍不能遁出關外屆時自當察看情形
妥籌辦理所有八月初五日以前勦辦情形理合據稟
馳奏伏乞

皇太后

皇上聖鑒訓示謹

奏

同治十一年九月十九日

請調毅軍赴甘摺

奏爲通籌甘肅全局請調湖南提督宋慶全軍赴甘助
剿以資分布而速戡定恭摺馳陳仰祈

聖鑒事竊

臣

自移駐省城後與穆圖善商議軍務一面

籌議募補標營兵丁精心訓練以實行伍爲異時撤減
客軍弁勇之計其時並不知穆圖善有赴陝之

命也七月二十七日欽奉

諭旨穆圖善交部省防原應卽赴本任以重職守第甯
夏現尙安謐且有張曜所部駐紮足資鎮懾陝西爲甘
軍後路糧餉所關此時南北兩路時虞零匪竄擾且新

撫回眾分別安插之處均距陝界匪遙非得力隊伍扼
紮要隘懾以聲威不足戢犬羊反覆之性著該將軍於
左宗棠進省將所辦防務分晰移交後統帶所部馬隊
並挑選步隊率以東行在陝西乾邠一帶擇要扼紮妥
籌防剿以副委任穆圖善所部分布近省各要隘尙稱
得大左宗棠到省後派兵接防是否足敷分布儻不敷
扼紮即可將該將軍所部酌量留防著與穆圖善妥籌
辦理穆圖善應俟該大臣布置妥協後再行拔隊東進
等因欽此仰見

聖懷垂念邊疆無微不至欽感難名臣奉到

諭旨與穆圖善悉心商議穆圖善擬以所部除附省及分駐金縣之河鎮營步隊二千一百餘名駐平番縣之南字營八百人馬隊一百騎留於甘肅其由省城北三十里火燒崖至土門止共四百七十五里穆圖善分紮馬步入營原以保秦王川糧源護運道而通涼甘兩郡及肅州關外文報之路最爲衝要議候臣調營分起填紮乃可按隊東行臣比以甘南一路漸就安謐統領奇捷營降補參將楊世俊所部馬隊四營步隊兩營尙堪

調撥當飭楊世俊帶青旗馬隊一營及捷勇步隊兩營由狄道沙泥赴省其分紮各處之紅旗白旗藍旗馬隊各營先後調至馬營監取齊由安定赴省八月十八日楊世俊到省正商令前進填紮間忽接安定防營前路統領記名提督劉端冕飛稟紅白藍各營馬隊行至馬營監次早開拔忽鼓譟潰倡逃各犯持刀斷路迫眾東行營哨各官倉卒訶禁不止馬勇有抵格受傷者有隨同奔竄者比經派隊馳往接護未潰隊伍一面追截潰卒楊世俊聞報即請前往撫諭

臣

飭就便將未潰

隊伍交原帶營哨各官帶赴蘭州點驗其計三百七十
六騎失馬勇丁五十餘名據總兵楊德俊等稟報倡潰
弁丁係伍隊領旗把總王錦如三隊領旗守備路鍾字
紅旂右哨哨長遊擊銜都司呂長樂後哨哨長把總張
志才都司馮高山白旂副哨長把總楊富貴藍旂千總
王士清前哨領旗勇目邱盛懷皆江皖人揚言餉項積
欠將一年西北苦寒不慣受各稱其眾倉黃奔潰計同
潰者三百九十六名馬則四百三十餘匹臣比飛咨陝
西撫臣邵亨豫提督李輝武曹克忠飭陝邊各營扼截

要隘一面飭秦州清水各防營准備迎剿一面調提督蘇家良帶所部馬隊兩營總兵李國良步隊一營由狄道赴伏羌進剿時潰卒已由馬營監出通渭過伏羌趨禮縣迫脅駐紮長道鎮之副白旂馬隊副白薪總哨逆擊張成倫力戰遇害潰勇仍脅其眾南趨甫抵伏羌適蘇家良帶隊馳至殺潰卒三十餘倉卒間悞殺楊世俊所遣招諭之將弁數名潰卒卽夜遁秦州又自秦州遁清水經關山圍眾邀截亦斃潰卒數名楊世俊馳至收同被裹之副白旂弁丁一百四十騎各營被裹勇丁亦

有騎馬隨同衝出者僉稱起意潰走者實止百餘人多
江皖籍此外二百餘名無不急思自拔惟被王錦如等
防制不能驟脫楊世俊卽帶數騎馳往招之甫近白沙
堡圍眾疑爲潰卒後隊阻截不前次日復往則潰卒已
竄隴州長溝旋由汧陽草碧溝分起狂竄一竄鳳翔一
竄靈武界崔木鎮追軍已相隔一日程矣幸曹克忠督
飭所部馬步各營由乾鄠分道截擊其自鳳翔竄出者
投於總兵徐邦道其自崔木鎮竄出者投於遊擊潘萬
才而潰卒已悉數收輯盡矣據各處稟報所收潰卒共

六百餘人蓋併沿途裹脅之數而言也臣飭楊世俊及
蘇家良魏光燾各率追師回防俟事定徐議所以處之
者有此一變而調防填紮北山之局不能急辦穩圖善
有緘催促臣媿無以應也伏思臣所部各軍自平涼以
西分紮至蘭州東關坡計程七百餘里自平涼以北分
紮至環縣花馬池以及甯靈中衛又自中衛西南分紮
靖遠與安定泉蘭交界之處計程委折近二千里其甘
南鞏秦階一道多從前孱軍以無餉不能多撤亦須臣
所部點綴相與維持計程縱橫近千里其河州新定之

區又須分部各軍聯絡其間以資控制前派攻剿肅州
共馬步十二營近撥攻剿西寧馬步十八營屢據徐占
彪劉錦棠稟求濟師臣亦無以應甘肅地居荒遠舊爲
漢回雜處之地西與番族接壤而居變亂之後尤需兵
力鎮壓免啟戎心兵勇移調爲艱深慮顧此失彼臣早
慮兵單顧未敢以增兵上瀆

宸聰者協餉已欠至千數百萬催呼莫應也地廣人荒
產糧不多採買無出也山谷層疊專恃陸運陸運專恃
車馱亂離之後騾馬雕耗接濟孔艱也頻年憂煩萬狀

拮据不遑非但不敢增兵並恐兵增而先以速潰者以此茲幸人民漸集耕墾漸多各軍所駐之處多已開屯又仰蒙

朝廷福庇歲事稍豐軍糧可免支絀轉運勞費亦資節縮自宜增調勁旅以速戡定之功竊見湖南提督宋慶所部駐神木一帶現在甯夏安謐邊外草地實無巨寇往來且經金有金運昌一軍駐紮足資屏藩若調其赴甘助勦於安定無所損而於微臣則大有益宋慶廉樸勇敢尤得軍心昔年于役

畿輔臣與同事最稱相得嗣臣遵

旨撥交李鴻章節制調遣彼此仍契洽無間也度隴以來宋慶關念大局歲時遣人遠來問勞兼察軍情其於公義私情惓惓不已如比如蒙

聖慈飭令赴甘度不憚於西行合無仰懇

天恩飭下綏遠城將軍定安迅令宋慶統帶全軍來甘助剿以速戡定出自

聖裁至宋慶赴甘應由榆林綏德一帶至鄜州合水慶陽涇州平涼以抵蘭州如蒙

俯允所請臣自當飭沿途各局預辦糧料草束以遄其
行不至停待至該軍餉銀本由河南解濟並懇

飭下河南撫臣源源批解俾毋缺乏庶師行糧隨於事

更期有濟合併聲明所有通籌大局請調毅軍情形謹
繕摺馳

奏伏乞

皇太后

皇上聖鑒訓示謹

奏 同治十一年九月十九日

請 飭張曜分營駐靈州花馬池片

再廣東提督張曜現駐甯夏分營駐鎮番防剿威名素著馭軍嚴明河西之民畏而懷之前此曾接其來緘甯夏無事如須兵力助剿亦不辭勞臣以甯夏要區屏蔽最遠未敢冒昧陳奏現在甯夏防務已鬆鎮番又有金順派營進紮是分防鎮番之營可以抽回可否

飭下張曜分營駐靈州花馬池一帶以便替出提督譚拔萃所帶老湘步隊三營馬隊一營前赴西甯隨同劉錦棠攻剿以期得力伏候

聖鑒訓示施行謹

奏
同治十一年九月十九日

密陳西甯情形片

再現署西甯知府馬桂源本循化回民捐納候選同知前任西甯辦事大臣玉通在事時力持撫局先委馬桂源署循化同知同治八年又咨穆圖善委馬桂源署西甯知府以本地回人署理地方篆務又以馬桂源之兄馬本源署鎮標遊擊代辦西甯鎮篆務臣前此所以有西甯名存實亡之奏也竊維西甯卽古湟中地屬荒服

漢民與番回雜錯而居自陝回肇衅以來西甯卽藉辦
教爲名乘機煽變王通力不能制則抑漢以從回冀圖
旦夕無事其時回目馬尒三狡黠異常旣以撫局愚官
復挾官以鈴制漢民凌虐殘殺無所不至漢民競訴於
王通王通無如之何臣度隴後屢據西甯各屬州噶爾
士民來營泣訴冤苦比以兵力遯難分布飭暫爲隱忍
聽候籌辦旋據西甯鎮黃武賢稟首逆馬尒三已伏冥
誅西甯回目係馬永福接充馬永福在湟回中尙稱謹
愿見官軍進剿河州懼其波及具稟乞撫適河回馬占

鰲亦央馬桂源乞撫馬桂源赴臣安定行營具稟臣與
穆圖善豫師會議十二條出示曉諭令其遵照一面派
道員馮邦棟赴碾伯察看情形妥爲籌辦馮邦棟到碾
先後收繳馬械千餘拔出陝回男婦千餘口分赴安插
化平川及大岔溝等處其西甯各土回延不呈繳詰其
故則稱陝回白彥虎禹得彥崔三等踞大小南川四出
擾害須暫留馬械以備不虞並請驅逐陝回以安淳境
臣固料其心懷叵測然其時好謀未露若持之過急必
以官兵繳變爲詞迫脅其眾致起事端遂飭提督何作

縹帶馬步入營先赴張伯聲言進剿陝回飭劉錦棠率馬步十營繼之劉錦棠至張伯曉諭官軍進剿大小南川在此路過土回毋庸驚恐比抵大峽口修壘則土回已與陝回合股抗拒矣據撫回閻興春等探報馬桂源八月初十日在西甯府東關私宅密約禹得彥白彥虎崔三等其議抗拒官軍一面調集各土回助逆黃武賢在威遠堡擒獲生賊俱亦相同並稱馬本源自稱統領陝隴兵馬大元帥馬桂源仍稱西甯知府在關外調集土回盡帶城中回兵回民出馬桂源出城兩日不返凡

西甯城內避難漢民習知其詐乘機開城拒守請西甯
道郭襄之及縣令主辦城防不准馬桂源等入城現查
城中回民不過數十戶又皆老弱內變無虞馬永福亦
在城中惟其子馬三哇本回教海裏飛四出勾煽馬永
福不能制現亦不令入城也回性多疑善詐非復尋常
賊情可比辦回不外剿撫兼施卽剿撫而言其輕重緩
急隨時隨事應之未可稍涉拘執操縱之機異於髮逆
擒逆及各處土回者以此揣度賊情始暗結陝回以拒
官軍近因陝回屢經痛創又將謾罪陝回以求苟免據

陳湜河州來稟馬桂源又自西甯遞呈哀懇設法極救
亦微言府城官民不肯納已情事臣比飭劉錦棠相機
辦理固無所容其遷就亦不必明正其罪遽絕其倖生
之心謹將賊中實情豫爲密陳伏乞

聖鑒謹

奏 同治十一年九月十九日

奇營勇潰自請議處片

再奇營馬隊之潰實由憚於西行若輩多出自降捻強
悍而不耐勞苦乃其本性所稱欠餉將近一年雖非虛

誣卸較之臣部各營積欠一年零三四個月者猶爲優
矣胡獨該潰卒以此藉口至統領降補參將楊世俊平
日待將弁勇丁頗有恩誼人素廉勤該潰卒無從肆其
誘煽且楊世俊自帶青旗馬隊一營及步隊兩營均已
安靜抵省各起潰卒各由駐營之地分道赴省先時不
及詳悉開導致有此變嗣馳赴前途亦收輯副白旗一
營雖所部潰走難辭咎責而情實可原合無仰懇

天恩免其置議惟

微臣

忝領兵符平時未能曉以大義

偶爾餉缺遂致紛紛潰逃又旬日三次檄催未及詳察

軍情遽加督責亦屬思慮不周疏誤之咎實無可辭應
請

旨交部議處以昭軍律伏乞

聖鑒謹

奏 同治十一年九月十九日

軍機大臣 字寄同治十一年九月三十日奉

上諭左宗棠奏攻剿西南肅州回匪獲勝統籌甘省全
局請調宋慶二軍攻剿請飭張曜分營駐靈州花馬池
密陳西南情形楊世俊所部潰走請免置議並自請議

處各摺片覽奏均悉西甯回匪始以乞撫爲緩兵之計旋結陝回抗拒官軍經劉錦棠等督軍進剿疊挫兇鋒惟逆首白彥虎等皆積年悍賊詭譎多端必須厚集兵力方能制其死命著左宗棠一面飭令劉錦棠等實力進剿一面添派勁旅繼進以期早日蕆功西甯城內漢民閉門防守亦當設法援應內外聯絡俾免疎虞馬桂源旣爲府城官民所拒卽著令其不必入城以釋羣疑左宗棠仍當隨時察看情形相機辦理肅州官軍雖屢次攻剿獲勝而該逆負隅如故著左宗棠飭令徐占彪

穩慎進攻力圖克拔並酌量添兵合圍毋任鋌走甘省
被兵日久亟應速籌戡定刻下西甯肅州均須增軍攻
剿省北一帶亦須派營填紮兵力不敷分布宋慶一軍
素稱得力現在陝省北路邊境尙屬安謐著定安卽令
該提督統帶全軍赴甘助剿該軍由榆林綏德一帶取
道慶陽平涼以抵蘭州左宗棠擬飭沿途各局豫辦糧
草軍行當不至遲滯宋慶接奉諭旨卽著剋期拔隊起
程進赴戎機本日並已諭令錢鼎銘將該軍月餉源源
接濟矣神木一帶如尙須派兵填紮卽著定安酌度布

置左宗棠現擬將譚拔萃所部官軍調赴西甯所有靈
州花馬池一帶著張曜就近分營駐紮以資穩固穆圖
善仍當飭令駐紮甘省城北之馬步各隊照舊駐紮認
真防剿勿遽裁撤楊世俊所部勇丁潰散情尚可原著
免其置議左宗棠自請議處並著加恩寬免將此由六
百里諭知左宗棠穆圖善定安並傳諭張曜宋慶知之
欽此

徐占彪丁憂仍請留營片

再據提督徐占彪稟稱親父徐耀於同治十一年三月

十二日在籍病故提督係屬親子例應丁憂懇卽委員
接統各營俾得交卸回籍奔喪等情前來查徐占彪於
客冬進攻肅州奮迅無前爲賊所憚茲僅孤城未破正
攻剿萬緊之時勢難遽易生手合無仰懇

天恩准令徐占彪留營帶兵俾得迅拔堅城以竟全功
俟肅州軍務平定再由臣給咨回籍以遂孝思而符定
制除咨部查照以該提督聞訃之日作爲丁憂日期外
謹附片具陳伏乞

聖鑒訓示謹

奏 同治十一年九月十九日

軍機大臣奉

旨著照所請該部知道欽此

格姑奉稿續編卷四十七目錄

西甯剿回大捷立解城圍摺

覆陳河州東鄉回眾蠢動情形片

奇營破脅各弁請註銷官階摺

軍機大臣 字寄同治十一年十月二十三日奉

上諭前據左宗棠奏兵力不敷分布請調宋慶一軍當
諭令該提督赴甘助剿茲據鮑源深奏稱該軍駐紮河
西晉省河防深資屏蔽值此冬令冰堅倉猝之間無從
另調別軍填紮毅軍拔隊遠征籌辦軍裝糧運事宜亦
需時日且冰雪長途行走難於迅速可否飭令稍緩西
進容另籌調度等語著卽照鮑源深所請知照該提督
暫緩拔營妥籌防堵仍一面豫爲部署俟來歲春融卽
行迅速前進不准藉詞耽延該提督拔隊後晉省河防

應如何嚴密布置之處仍著鮑源深先事妥籌毋稍大意甘肅西甯肅州一帶攻剿情形若何現在毅軍暫難成行該處自應另籌調度左宗棠當斟酌軍情分爲布置勿稍疏虞將此由五百里各諭令知之欽此

西甯剿匪大捷立解城圍摺

奏爲詳陳西甯剿匪捷狀并續獲大捷攻破小峽口臣
壘數十座徑薄西甯府城立解重圍現籌辦理情形恭
摺馳陳仰祈

聖鑒事竊照統領湘軍道員劉錦棠八月二十四至九
月初四日西甯剿匪獲勝并初六日踏破觀音堂賊壘
大畧情形已於九月十九日附片具陳并聲明詳細情
形容俟續報八月二十四口馬步賊數千分爲二股一
循山而下直撲西甯營卡都司李雙良防營一出彥才

溝阻截前路各營劉錦棠率遊擊熊隆名都司董福祥
副將陳宗蕃分道往擊遙見撲營之賊五六百而山谷
溝坎伏賊甚多劉錦棠麾軍急進李雙良亦出壘夾攻
先將撲營之賊擊敗原上之賊預砌礮臺憑高下擊提
督譚和義蘇大德羅照陞陳啟明副將陶鼎金各率馬
步由平戎驛馳至賊之出彥才溝者知勢不敵縮退溝
內熊隆名乘勢壓追譚和義等鼓銳登山立殲悍賊多
名賊乃大潰逐北越嶺焚賊百餘名是夜馬步隊分伏
彥才溝口擬俟賊出擊之賊知有伏不出二十五日

角溝灣賊數千列隊小峽口各山頭千餘賊由三十里
舖撲提督譚上連營壘提督何作霖余虎恩出隊援之
譚上連亦憑壘力擊礮石雨注賊負創遁劉錦棠聞報
密調後路馬步台紮三十里舖各營并於營邊修砌礮
臺安放後膛開花車輪大礮以待二十六日賊匿不出
而遑北陝回營內騾馬千餘出壘放草副將鄧增以車
輪大礮測準向人馬聚處轟之連開三十餘礮礮子半
飛入賊壘半落人馬叢中賊棄壘越山而逃是夜遑北
收屍之賊紛歟徹旦斃賊蓋不知其數也二十七日各

營仍依山設伏午間賊由山頂迤邐而下熊隆名以馬
隊誘之賊見隊少擁撲而下鄧增仍連施大礮何作霖
等分隊擊之賊大潰追近賊卡而返旋據西營防營李
雙良報稱是日馬步賊千餘撲近營壘李雙良憑牆刀
禦有悍賊揮大刀徑撲營壕爲官軍洋鎗擊倒羣賊以
矛桿昇之而逸復獲生賊詢之蓋卽白彥虎也二十八
日各營仍於三十里鋪設伏賊僅以數百人散匿山谷
官軍亦以零隊擊之賊遁劉錦棠以羊角灣之賊知我
有備料不復出而高糧溝緊逼平戎爲白彥虎畢大才

之黨所據倚觀音堂紅水泉爲固必誘出創之遂抽隊
夜抵彥才溝口二十九日見馬賊百餘馳騁溝中大股
繼出陳宗蕃佯作敗狀誘其深入賊噪而前伏隊四起
賊駭而奔追殺十餘里賊屍枕藉遙見駱駝堡賊卡十
餘座劉錦棠揮軍緊追賊不及入卡守卡者亦相隨狂
竄時已黃昏卽就賊壘分軍駐之凌晨檢視賊屍計五
百餘具刀矛鎗礮則拾不勝拾矣生擒土回領隊馬仲
供稱白彥虎二十七日出隊爲礮子洞穿左乳又西甯
逆回馬桂源之弟馬眞源亦爲礮子洞穿右肋撒拉回

目多半爲官軍擒斬此八月二十四日至九月初四日以前剿賊連獲大勝之實在情形也該逆疊經痛剿仍恃眾穩抗并分股繞出沙溝一帶伺劫糧運時督帶綏定營候補直隸州知州龍錫慶駐大峽口初五日率所部三百人循探賊蹤甫抵郭爾堡卽遇逆股四五百蜂擁接戰龍錫慶擊敗之追抵沙溝乘勝破賊壘一座守賊潰焉餘三座驚竄官軍入堡傳餐忽有大股驟至逼堡環攻龍錫慶力守達曙亡傷弁丁七十餘人仍整隊旋營參將余士力督戰不力龍錫慶斬之軍前以徇劉

錦棠聞龍錫慶深入被圍初六日黎明飛調馬步向觀音溝赴援入溝十里許道旁有賊堡七座馬隊先至堡賊紛紛出拒比步隊至奮威衝殺賊棄巢奔立焚其巢躡追入九里大堡巾山馬步賊千餘另股由兩山旁抄出劉錦棠分軍力戰三時之久賊均敗潰適龍錫慶亦已旋營遂收隊還初八日小峽之賊已大股出撲營壘另股由左面山溝抄出劉錦棠飭譚上連等列隊壘前飭鄧增以大礮向擊賊譚潰不復成列馬隊跟蹤馳追山溝之賊從旁衝出陶鼎金等下馬持矛攔刺何作霖

等分路抄之賊不能支追越山巔斃賊三四百名初九日賊大股趨北岸鄧增以大礮擊散其南岸賊千餘掛列山頂各營以鎗礮仰擊旋亦敗遁初十日副將譚慎典率親軍馬隊赴礮伯迎糧過平戎驛忽馬賊二百餘擁至譚慎典分其隊之半護糧一半接仗行近高店堡都司張俊從堡中躍出賊紛竄十二三兩日劉銳棠抽隊赴平戎驛修橋并渡渾至紅崖子溝築壘以通威遠堡糧路威遠之馬圈口班家灣等處時有回逆出擾屢經統帶靖西三營提督西甯鎮總兵黃武賢搜剿頗有

斬賊十四日平戎橋工將竣有百餘馬賊從觀音堂溝
彥才溝鼓噪而來劉錦棠飭陳啟明陶鼎金等率馬隊
衝擊南山復有大股賊至綿亘二十里陳啟明等以眾
寡懸絕收隊憑壘施放鎗礮劉錦棠飛令各軍渡湟而
南賊趁官軍半渡四面猛撲適譚和義蘇大德齊至土
卒直前奮擊斃賊多名熊隆名董福祥時在馬營灣聞
平戎驛礮聲甚緊疾馳而來提督席大成尹興茂等亦
至張兩翼分抄羅照陞陳啟明等乘機猛進賊大敗官
軍合圍兜追斬賊二百餘名生擒十五名十五夜賊乘

雪於李雙良營壘西三里山巔連築七卡大股分紮隔
截前敵各營十六日劉錦棠前往查看馬賊擾至平戎
驛步賊排列護卡約近萬人劉錦棠飭李雙良堅守勿
出飛率各營渡橋直上馬賊向前抗拒官軍鎗礮齊發
立斃多人官軍奮追抵馬營灣對岸劉錦棠飭令蘇大
德築壘羅照陞等列隊以待賊忽大至馳下平川適何
作霖席大成尹興茂等馳至鄧增亦護大礮前來連開
數礮賊稍卻各軍分左右力戰殲賊無數賊縮退壘中
官軍逼攻壘中礮石紛飛官軍傷亡不少劉錦棠令勿

撤隊是夜風雪嚴寒裂膚刺骨軍士露立賊壘之外無
一解者十七日黎明劉錦棠由北岸亂流而渡令鄧增
向山頂轟三十餘礮斃賊甚多大股走匿山凹劉錦棠
以堅壘難蕩平乃整旅折赴馬營灣河灘上下合董
福祥連夜添造木橋二十日抽撥三營渡河築壘合譚
上連何作霖等分扼淠南北以扼賊衝部署甫定賊果
率大股下山意圖阻官軍工作何作霖等分途決盪斃
賊數十名賊敗上山築少頃復率數百騎由北岸山溝
衝近河邊劉錦棠飭各軍迎剿一面令鄧增以大礮隔

聶之賊大敗而逸陶鼎金等飛馬截之斬賊多名生擒
一名二十二三兩日賊時以零騎分擾南北而於紅莊
子對岸聯紮數壘蓋防官軍由北岸進攻也劉錦棠佯
若不知日夜督修橋壘並於橋兩旁築礮臺譴之二十
四五六等日陸續派隊往碾伯接糧並增修卡壘零賊
時出阻擾多被擒斬二十八日五鼓大股撲近新修之
卡白彥虎舉大才之黨約土回由馬營灣山下平川渡
湟兩股將合約七八千人劉錦棠分軍渡湟猛撲之賊
惶懼縮退其梟水不及者董福祥等悉斬之賊回撲席

大成營壘董福祥等由左路馳至夾擊賊仍敗遁淳南
賊見北岸賊敗渡水來援尹興茂等折回夾擊賊翻山
而竄是日步賊千餘至小硤分股伏溝中昇大鐵礮攻
何作霖之營礮子墜人壘中者約重二斤餘何作霖率
隊從壘牆躍出擊散賊眾并奪其礮二十九日劉錦棠
令於北岸山上修築一營十月初一日又於新營百五
六里增修一營爲進逼計兩日有馬步來擾均擊改初
二小峽口賊千餘來撲營壘譚上連等擊斬數十生擒
三名訊據供稱是日陝回往北川攻民寨掠食劉錦棠

合各營分左右捲旂疾趨奪高寨之險高寨前一小卡
守賊數十人見官軍突至棄卡逃入高寨高寨守賊約
三千餘列械出扼官軍馬步齊進銳不可當忽隔河開
花大礮子飛墜賊叢中賊益恟懼驀山滾澗而逃官軍
譟噪乘之刀斫矛刺賊屍枕藉高寨一帶十餘卡壘一
氣踏平比小峽大隊馬賊來援亦經鄧增以大礮擊退
擒斬二百餘名奪獲馬械極多據擒賊趙啟泰於積屍
中指認回目蘇九和一名並供此股陝回最多是夜官
軍即紮於此又增修一壘初三日臣宗棠所謂前往助

剿之提督劉明燈及副將滕春山等至高寨與劉錦棠
晤商劉明燈所部馬步六營從七里舖延紮至彥才溝
替出劉錦棠所部左右翼兩營及綏定兩營以便滾移
進取又增修三壘賊見官軍連日於高寨增壘意南岸
必虛初五日大股由小峽出撲官軍迄未得達官軍亦
未窮追是夜又於八旂壘西增修兩卡初七日賊大股
圍撲折修之卡官軍以連夜未眠僅以鎗石火箭火蛋
禦之賊見官軍不出各持馬刀紛入壕溝何作霖譚上
連等分兩路挺矛直出立斬悍賊三十餘名賊稍退適

鄧增運大礮至對路狹賊多處連發十餘礮賊乃敗潰
初八日分軍扼小峽正路及西南兩路另派隊上山增
修一卡賊紛至官軍擊卻之一股凶悍異常愈擊愈進
何作霖憤甚大呼陷陣縱軍衝殺縱橫盪決賊不能支
始紛紛敗潰初九日黎明賊大股由三十里鋪竄至官
軍按隊不動俟賊漸逼營前乃分左右出擊賊屢卻屢
前官軍奮威衝殺立斬悍賊二十餘名飛勢壓剿斬賊
遂多此九月初五至十月初九日滇營進逼連獲大捷
攻克各要隘之實在情形也劉錦棠以南岸難攻遂於

是夜潛師夜起改率各營由馬營灣過橋至高寨會襲
小峽賊壘分前左右三路銜枚馳近北岸賊壘賊始驚
覺官軍已蜂擁而上次第奪山麓三壘拔幟立幟正追
逐間忽小峽內塵沙蔽日賊約萬人由山頭及中路奔
來官軍整隊迎擊殪賊數十左翼一營列隊左山巔賊
力爭此地自辰至申血戰不少卻譚和義等皆身被數
創仍裹創力戰大呼突陣賊皆辟易紛紛敗退是日惶
南一股撲近官營並以鎗橫擊惶北官軍經何作霖等
擊斃多名是夜劉錦棠令各營急運磚石增修廢壘並

於山頭添修一壘扼之十一日賊於對山亦築數壘十二偵賊大股匿峽中守壘之賊堅壁不出劉錦棠懸重賞挑選壯士攻南山各卡其北山四壘分各軍攻其三劉錦棠親率各營隨後策應夜近賊壘乘賊未覺火器紛飛著處皆然賊驚起拒戰而壯士已從濠中躍出以肩爲梯攀壘騰上矣須臾三壘均破南山賊卡亦同時攻克各卡壘賊約近千人無漏逸者官軍卽夜分填所奪三壘駐之十二日賊大股來犯劉錦棠飭三壘各以一營守壘餘列長陣誰之羅照陞陳宗蕃李雙良等率

所部舊擊斃賊多名立將所破賊壘修築完好護糧入壘並接修運礮臺車大道十七日署西甯道郭襄之遣人縋城來告被圍兩月城中糧食將盡十四夜五鼓賊乘梯襲城雖經擊退然勢甚危迫乞速應援適馬桂源稟請官軍暫退礮伯卽誠心就撫又撒拉八工回昂貴奴勒等亦具稟代西甯土回乞撫劉錦棠知其意在緩兵十八日黎明飭余虎恩席太成護五十里舖各壘自率各營護大礮上北岸山頂正在分撥之際賊忽分三股一由小峽口南山一由馬營灣下徑犯官軍營安意

乘南岸之虛其大股則向北山急進劉錦棠以南岸各卡修繕完固力足制賊令鄧增測準北山賊壘開大礮轟擊合譚和義護之一面分飭兩路攻左右賊壘一路擊正中入股一路策應兩時發大礮子六十餘賊三壘牆垣皆坍塌避匿溝中劉錦棠麾各路猛進陣斬悍賊二百名賊大潰官軍蹣跚緊追連破北山西面卡壘十餘座乘勝歷下山梁賊棄山麓各壘而逃一由湟北竄韻家口一由水渡湟南當將峽內羊角灣羅家灣二十里舖十里舖一帶卡壘悉數踏平其南岸之賊見官軍

自北而南截其歸路竄走南山之南余虎恩席大成追之破其山上卡壘十餘座越山至羊角灣會隊其竄韻家口一帶者見董福祥羅照陞等引軍突至均棄寨向西甯而逃薄暮劉錦棠飭各營歸隊分紮兩岸賊壘一面整修濠牆防賊回撲夜分馬賊數千復拌命來犯官軍結隊衝擊賊屍遍野仍卽敗遁十九日黎明瞭見西甯附城各莊寨火起劉錦棠飛調馬步迅進比抵東關逆首馬本源馬桂源已同各土回頭目於先夕三鼓各挈逆眷向東川竄走殿後馬賊數百被陶生林等追擊

四散向南川而遁計連日斃賊約三四千人馬騾軍械遺棄滿路署西甯道郭襄之西甯知縣恩祇率城內難民男婦老弱二萬餘名望塵迎拜喜極而涕劉錦棠宣布

皇仁遂加撫諭令其照常防守其城外老弱回民約千餘口籲乞曲貸生命亦令免死安插並諭土回被裹者准其歸懷安插此十月初十日至二十日攻破小峽要隘力解西甯府城重圍之實在情形也臣維礪伯赴西甯距縣七里渡湟水西南達府城兩山對峙湟水中流

古所稱險中者也山大峽口抵小峽口數十里高峰危
聳中通一徑岸路僅寬數尺兵馬能魚貫不能雁行南
北溝岔紛歧賊蹤出沒其間排又子錦平地施放命中
較易此次叛逆馬本源馬桂源兄弟先請官軍驅逐陝
回迫官兵甫進大峽忽喉陝回助逆拚死抗拒又糾五
工六工撒拉回眾合勢抗拒地險賊眾又皆著名兇狡
劉錦棠孤軍深入以馬步十八營寸紮八十餘里賊時
於山凹中出隊阻截連道圍撲各營聲氣閒隔時須調
撥救援前後計兩月有餘大小五十餘戰幸賴

朝廷威福無戰不捷得以掃除積年兇慝挈遼中境土
仍隸職方此固非臣等所能逆料也至邊地苦寒大小
峽口一帶山谷盤互日月蔽虧冰凌凝結最早計五十
餘戰中半皆夜不收隊露立雪窖中擊柝之聲與號寒
之聲相雜而軍士無一怨者非平時訓練有方奚以致
此現據劉錦棠稟報馬本源馬桂源帶同各土回目挈
眷逃入撒拉蓋該逆本循化龐人與撒拉同鄉并撒拉
素相暱就者也臣已飭按察使陳湜河州鎮沈玉遂督
同河州撫回馬占釐圖之據報該逆已抵巴燕戎格矣

大抵同情最忌縛獻阿剌總須其自投羅網耳至陝回
已焚棄所踞大小南川巢穴揚言直奔甘州嗣仍踞西
川未動意或求撫亦未可知臣宗棠前調提督吳隆海
率果軍降補參將楊世俊率奇捷馬步等營合馬隊三
營步隊八營隨同劉錦棠進剿比抵碾伯則小峽口業
已攻克劉錦棠兵抵西甯矣現正搜除餘匪分別剿撫
以靖地方所有此次最爲出力員弁合無仰懇

天恩加以鼓勵

賞穿黃馬褂三品卿銜布政使銜卽選道雲騎尉世職

法福凌阿巴圖魯劉錦棠銳善戰謀勇兼優耐苦耐
勞爲一時統將之最臣等不敢妄擬保敘應如何加
恩之處出自

聖裁

實穿黃馬褂頭品頂戴記名提督達桑阿巴圖魯何作
霖識畧過人膽勇出眾爲賊所憚應請無論甘肅抗鎮
缺出儘先題奏頭品頂戴記名提督奇車博巴圖魯余
虎恩忠勇奮發能衝能堵應請遇有陝甘提鎮缺出儘
先題奏並請

賞穿黃馬褂頭品頂戴記名提督伯奇巴圖魯譚上連
隊伍整嚴樸實勇敢應請遇有陝甘提鎮缺出儘先題
奏頭品頂戴記名提督霍隆武巴圖魯席大成頭品頂
戴記名提督奇朗阿巴圖魯譚和義頭品頂戴記名提
督果勒明阿巴圖魯羅照陞頭品頂戴記名提督哈豐
阿巴圖魯尹興茂均請

賞穿黃馬褂記名提督呼敦巴圖魯蘇大德請

賞給頭品頂戴記名提督和爾經額巴圖魯陳啟明請
賞給正一品封典總兵銜推補副將譚慎典請免補副

將以總兵

交軍機處記名總兵銜安徽補用副將依清阿巴圖魯
陳宗蕃請

賞給頭品頂戴副將銜儘先拔補參將陶鼎金請

賞給清字勇號記名提督巴克坦巴圖魯肅元亨請

賞給頭品頂戴提督銜記名總兵綽另巴圖魯楊耀關
記名總兵直勇巴圖魯黃錦雲均請

賞換清字勇號花翎補用都司董福祥請免補都司以
遊擊留於陝西儘先補用並

賞給二品頂戴二品

封典較翎補用都司張俊請免補都司以遊擊留於陝西儘先補用並

賞給花翎

賞給勇號藍翎補用都司李完良請免補都司以遊擊留於陝西儘先補用並加參將銜

賞換花翎花翎補用都司張萬會請免補都司以遊擊留於陝西儘先補用並加參將銜記名提督多托哩巴圖魯潘長清記名提督胡恩登額巴圖魯陳建侯記名

提督阿木巴凌武巴圖魯楊玉週記名提督努克齊思
斯琿巴圖魯李有成記名提督喀勒崇依巴圖魯王福
田記名提督瑚松額巴圖魯李政洪記名提督愛什蘭
巴圖魯唐國華均請

賞給頭品頂戴記名提督揚勇巴圖魯劉象賢記名提
督額特和恩巴圖魯宋祚發記名提督業鏗額巴圖魯
鄧時益記名提督蘇彰阿巴圖魯李隆寶記名提督西
吉爾琿巴圖魯李清勝記名提督悍勇巴圖魯喻少遠
記名提督額騰依巴圖魯匡義志記名提督伊伯德恩

巴圖魯彭明達記名提督訥恩登額巴圖魯李春元記
名提督雄勇巴圖魯李恆春記名提督傑勇巴圖魯周
恆升提督銜記名總兵懋勇巴圖魯朱正和均請

賞給正一品封典記名提督納清額巴圖魯李協和記
名提督額爾德蒙額巴圖魯趙寶林均請

交部從優議敘記名提督奮勇巴圖魯廖得勝記名提
督摺勇巴圖魯彭楨祥提督銜記名總兵勉勇巴圖魯
郭慶才記名總兵武勇巴圖魯曾昌明記名總兵力勇
巴圖魯蕭玉吉總兵銜補用副將銘勇巴圖魯李克常

總兵銜補用副將奮勇巴圖魯符世禮副將銜補用參將偉勇巴圖魯胡義和均請

賞換清字勇號記名提督黃友信記名提督邱俊鳳總兵銜湖南儘先補用副將張沛福建補用副將鄧增均請

賞給清字勇號鄧增並請

賞加總兵銜記名提督張振壽劉得喜二品頂戴參將銜兩江補用遊擊李章貢遊擊銜陝西補用都司楊錦棠均請

賞給勇號提督銜記名總兵穆勇巴圖魯賀長發記名
總兵阿克丹巴圖魯湯秀齊記名總兵穆勇巴圖魯歐
陽勝記名總兵質勇巴圖魯葛致清記名總兵翊勇巴
圖魯劉國斌均請以提督總兵記名遇有提鎮缺出請
旨簡放提督銜記名總兵愛星阿巴圖魯雷貴才記名
總兵穎勇巴圖魯喻先達總兵銜留陝補用副將姜鏡
成總兵銜補用副將彭榮復均請以提督總兵記名遇
有提鎮缺出請

旨簡放記名提督克勇巴圖魯陶生林請

賞給頭品頂戴並

賞換清字勇號補用副將克勇巴圖魯胡英傑補用副將董官寶李榮珥張得榮賀益陞總兵銜兩湖補用副將強勇巴圖魯蘭福喜補用副將端勇巴圖魯周廷福補用副將譚全才楊再發均請免補副將以總兵記名請

旨簡放副將銜補用參將程玉修儘先參將盧有升藍翎儘先拔補參將周國泰均請免補本班以副將儘先補用並加總兵銜周國泰並請

賞換花翎參將銜留陝補用遊擊楊金龍參將銜福建
補用遊擊威勇巴圖魯唐王德參將銜兩江補用遊擊
蘇秀生均請免補本班並免補參將以副將仍留原省
儘先補用楊金龍蘇秀生並請

賞給勇號參將銜儘先遊擊袁紹華請免補本班並免
補參將以副將儘先補用並請

賞給勇號補用遊擊沈玉貴請免補遊擊並免補參將
以副將留於湖南儘先補用二品頂戴遊擊銜補用都
司湯廷幹遊擊銜儘先補用都司劉長其傅長春鄒祖

德張得昇補用都司李孝隆均請免補都司並免補遊擊以參將儘先補用張得昇劉長其李孝隆並請

賞給勇號參將銜兩江補用遊擊榮勇巴圖魯鄧金陵請免補本班以參將仍留原省補用並請

賞加副將銜遊擊李得勝請免補本班以參將儘先補用並請

賞給勇號遊擊銜河南補用都司秀勇巴圖魯蘇貴興請免補都司並免補遊擊以參將留於原省補用並請賞加副將銜湖南補用都司彭秀文兩江補用都司胡

少亭均請免補本班以遊擊留於原省補用彭秀文並請

實給勇號胡少亭並請

實加參將銜藍翎補用都司周玉堂請免補都司以遊擊儘先補用並請

實換花翎都司銜湖南補用守備朱星貴請免補守備並免補都司以遊擊仍留原省儘先補用花翎守備趙自新石成玉田九福張登龍李雙海王廷棟田仲魁藍翎守備丁添祥均請免補守備以都司儘先拔補並請

黃加遊擊銜守備銜千總羅言王俊邦胡登花張果張
廣吉杜錫斌董天海苗仲會何有道均請免補千總並
免補守備以都司儘先補用藍翎千總熊來儀范永清
聶青山均請免補千總以守備儘先補用並

黃煥花翎補用把總張瑞揚董占富趙奉樂薛成德均
請免補本班以千總儘先補用並加守備銜張瑞揚並
請

黃戴藍翎儘先外委夏德華請免補外委並免補把總
以千總儘先補用並請

賞戴藍翎運同銜分省補用直隸州知州優勇巴圖魯
武條候選直隸州知州王鎮圻留陝前先補用直隸
州知州周漢均請免選補本班以知府留於陝西歸軍
功候補班前補用留陝補用直隸州知州龍錫慶請以
本班改留甘肅歸候補班前先補用並

賞加知府銜藍翎山西補用知縣吳光熊請免補本班
以知州仍留原省歸軍功候補班前先補用並請

賞換花翎同知銜浙江候補知縣袁奎齡請俟補缺後
以同知歸軍功候補班前先補用此外實在出力員弁

丁勇容俟彙案保獎以示激厲其疊次陣亡將弁實均
係百戰精銳於絕幽艱險中力竭捐軀實堪軫惜謹另
繕清單伏懇

天恩飭部分別從優議卹以作士氣而慰忠魂謹合詞
陳

奏伏乞

皇太后

皇上聖鑒訓示施行謹

奏
同治十一年十一月初九日

同治十一年十一月二十日內閣奉

上諭左宗棠豫師奏剿匪獲捷西甯府城解圍出力各員弁請獎並將陣亡各員弁開單請卹一摺叛逆馬本源等糾集陝回及撒拉回眾圍撲甘肅西甯府城經左宗棠派令道員劉錦棠等督兵進剿連戰克捷踏毀小峽口等處賊壘數十座乘勝直薄城根該逆抵死抗拒官軍結隊奮擊賊大潰敗立解西甯城圍統計斃賊三千名奪獲驃馬器械無算剿辦尚爲得手道員劉錦棠著賞給白玉翎管一枝白玉搬指一箇大荷包一對小

荷包兩箇火鏢一把以示優異提督何作霖著無論甘肅提督總兵缺出儘先題奏余虎恩著遇有陝甘提督總兵缺出儘先題奏並賞穿黃馬褂提督譚上蓮著遇有陝甘提督總兵缺出儘先題奏席大成等均著賞穿黃馬褂蘇大德著賞給頭品頂戴陳啟明著賞給正一品封典副將譚慎典著免補副將以總兵交軍處記名請旨簡放陳宗藩著賞給頭品頂戴參將陶鼎金著賞給胡敦巴圖魯名號提督蕭元亨著賞給頭品頂戴總兵楊耀閣著賞換達春巴圖魯名號黃錦雲著賞換胡松額

巴圖魯名號都司董福祥張俊均著免補都司以遊擊
留於陝西儘先補用董福祥並賞給二品頂戴二品封
典張俊並賞換花翎賞給果勇巴圖魯名號李雙良張
萬會均著免補都司以遊擊留於陝西儘先補用並賞
加參將銜李雙良並賞換花翎提督潘長清等均著賞
給頭品頂戴劉象賢等均著賞給正一品封典李協和
等均著交部從優議敘廖得勝著賞換錫林巴圖魯名
號彭植祥著賞換珠武巴圖魯名號總兵郭慶才著賞
換斐凌阿巴圖魯名號曾昌明著賞換奇車博巴圖魯

名號蕭王吉著賞換吉勒通阿巴圖魯名號副將李克
常著賞換勒爾金巴圖魯名號符世禮著賞換喀勒崇
依巴圖魯名號參將胡義和著賞換齊朗阿巴圖魯名
號提督黃友信著賞換莽阿巴圖魯名號邱俊鳳著賞
給拉禮巴圖魯名號副將張沛著賞給巴圖隆阿巴圖
魯名號鄧增著賞給依博德恩巴圖魯名號並賞加總
兵銜提督張振壽著賞給健勇巴圖魯名號劉得喜著
賞給悍勇巴圖魯名號遊擊李章貢著賞給赫勇巴圖
魯名號都司楊錦棠著賞給勁勇巴圖魯名號總兵賀

長發等雷貴才等均著以提督總兵交軍機處記名遇有缺出請旨簡放提督陶生林著賞給頭品頂戴並賞換葉鏗額巴圖魯名號副將胡英傑等均著免補副將以總兵交軍機處記名請旨簡放參將程玉修等均著免補本班以副將儘先補用並賞加總兵銜周國泰並賞換花翎遊擊楊金龍等均著免補本班並免補參將以副將仍留各省儘先補用楊金龍並賞給強勇巴圖魯名號蘇秀生並賞給振勇巴圖魯名號袁紹華著免補本班並免補參將以副將儘先補用並賞鋒勇巴

圖魯名號沈玉貴著免補遊擊並免補參將以副將留
於湖南儘先補用都司楊廷幹等均著免補都司並免
補遊擊以參將儘先補用內張得昇並賞給達勇巴圖
魯名號劉長其並賞給壯勇巴圖魯名號李孝隆並賞
給卓勇巴圖魯名號遊擊鄧金陵著免補本班以參將
留兩江補用並賞加副將銜李得勝著免補本班以參
將儘先補用並賞給確勇巴圖魯名號都司蘇貴興著
免補都司並免補遊擊以參將留於河南補用並賞加
副將銜彭秀文等均著免補本班以遊擊各留原省補

用彭秀文並賞給揚勇巴圖魯名號胡少亭並賞加叅將銜周玉堂著免補都司以遊擊儘先補用並換花翎守備朱星貴著免補守備並免補都司以遊擊仍留湖南儘先補用趙自新等均著免補守備以都司儘先補用並賞加遊擊銜千總羅言等均著免補千總並免補守備以都司儘先補用熊來儀等均著免補千總以守備儘先補用並賞換花翎把總張瑞揚等均著免補本班以千總儘先補用並賞加守備銜張瑞揚並賞戴藍翎外委夏德華著免補外委並免補把總以千總儘先

補用並賞戴藍翎直隸州知州武條箴等均著免選本班以知府留於陝西歸軍功候補班前補用龍錫慶著以本班改留甘肅歸候補班前補用並賞加知府銜知縣吳光熊著免補本班以知州仍留山西歸軍功候補班前補用並賞換花翎袁奎齡著俟補缺後以同知歸軍功候補班前補用其餘出力員弁勇丁著准其案案保獎歷次陣亡之遊擊陳湘林等一百三十七員均著交部分別從優議卹另片奏請將降補遊擊之提督開復等語遊擊熊隆名此次進剿西甯屢著戰功

深知愧奮能隨名著准其開復提督原官仍交軍機處
記名簡放並賞還勇號以昭激勸該部知道單併發欽
此

軍機大臣 字寄同治十一年十一月二十日奉

上諭左宗棠豫師奏西甯解圍現籌辦理情形一摺已
明降諭旨宣示出力陣亡各員照請獎卹矣西甯被圍
日久此次劉錦棠督軍深入立解城圍並分別安插難
民降眾辦理甚妥該處久爲賊擾民不聊生一切善後
事宜卽著豫師會同左宗棠悉心布置毋令失所回族

結黨甚固醜類繁多仍恐有不逞之徒暗中勾結別滋事端亟應將伏莽一律掃除毋貽後患並著左宗棠豫師隨時加意防範以期綏靖地方至叛逆馬本源等帶同土匪挈眷逃遁已抵巴燕戎格豈可任其遠颺仍當設法按名弋獲明正典刑以示懲儆陝回是否仍踞西川如其逃向甘州左宗棠當飭令各軍跟蹤追剿並檄甘涼各隊迎頭兜擊就地殲除毋聽其乞撫緩師致墮賊計將此由六百里各諭知之欽此

覆陳河州東鄉回眾蠢動情形片



再臣前欽奉九月十八日

諭旨河州回眾亦有蠢動情形倘該降眾再有反覆則是前功盡棄大局殊屬可虞左宗棠晉省後自己熟籌布置等因欽此查河州大東鄉地方素稱盜藪積匪高奉朝馬祥楊由什等於八月內造謠煽亂間出搶劫經臣軍總理營務處布政使銜前山西按察使陳湜出示鎮撫良民俾無從亂一面密拏匪類該逆計不得逞僅脅數百人據太子寺近附上下各處攔途劫略九月十五六兩日民團往捕該匪抗拒接戰殺斃民團十餘人

陳湜及河州鎮總兵沈玉遂等於十七日率官軍分路
搜捕當擒斬三十餘名餘眾四散連日又經回目馬占
整率民團緝獲三十餘名馬祥亦擊解訊明正法據供
高奉朝已逃竄西甯現密飭搜捕被脅之眾則已概行
解散其未獲匪徒已飭地方官督馬占龍督團密擊地
方仍一律安堵如故足以仰慰

宸廑所有撫剿河州東鄉實在情形理合附片陳明伏
乞

聖鑒訓示謹

奏同治十一年十一月初九日

奇營被脅各弁請註銷官階摺

奏查明奇營潰卒案內被脅各弁請

旨飭部註銷所保官階恭摺仰祈

聖鑒事竊照奇營馬隊潰走經官軍追抵陝疆由前甘肅提臣曹克忠督軍截剿全數收撫並將變亂之路鍾字等五犯查出斬梟其王士清等九弁訊由迫脅亦經奏參革職在案茲據統領奇捷等營降捕參將楊世俊查報同潰弁勇除由曹克忠正法參革外尚有胡治等

九十七弁雖係追脅同行與甘心變亂者有別然皆忝
係職官未便置之不論相應繕具清單請

旨飭部查照單開各弁將所有歷保官階概行註銷以
示薄懲查該弁等業經曹克忠編列成營如能奮勉立
功以贖前愆仍可量求

恩澤庶功罪不至兩掩而情法亦得其平是否有當謹
專摺具陳伏乞

皇太后

皇上聖鑒訓示謹

奏同治十一年十一月初九日

軍機大臣奉

旨胡治平等應保官階均著概行註銷欽此